

Segundë cartë nabëquë'e San Pablo lu ra Corintios

**Bëquë'e Pablo cartë rë' lu
ra mënë shtë Corinto**

1 Na Pablo, nahia tubi poshtë shtë Cristo Jesús purquë zni na voluntá shtë Dios. Juntë con Timoteo, bécha'a naná rialdí ldu'i shti'dzë Jesús, quëquë'e na'a cartë rë' nu guëshe'ldë ná'ahin lu grupë shtë shmënë Dios naquërelde ciudá Corinto nu zac lu grë ra nabëzuné Dios almë shtë rai', lë'e të naquërelde regiuni shtë Acaya. ²Gulë bè'në recibir bendición shtë Dios con galërbedchí ldu'u naná rne'e Dios Shtáda'a, juntë con Jesucristo Shláma'a.

Galërzac zi shtë Pablo

³Zudé'na'a alabar Dios, lë'e Dios nu Dadë shtë Jesucristo Shláma'a. Lë'e më na Dadë nu quëhúni' consolar cadë lë'e mieti; na më el quë narga'a ldu'u mieti. ⁴Lë'e më rúni' consolar lë'e hia'a iurë lë'e hia'a rzac zi hia'a të parë gac guëdë'na'a consolar los de más sa' hia'a narzac zi lu cusë durë. Quëdë'na'a consolar lë'e mënë con diza'quë naze'dë de Dios. ⁵Nalé rzac zi hia'a purquë na hia'a shmënë

Cristo, perë también nalé quëhunë më consolar lë'e hia'a. ⁶Si talë rzac zi hia'a, nahin parë bien shtë të, të gapë të galërbedchí ldu'u nu parë gac salvar të. Mizmë cusë durë naquëac con lë'e na'a, nahin parë cuedchí ldu'u të; pues zni rua'a ldu'u të con pacënci ra cusë durë nadápa'a. ⁷Rialdí ldu'u na'a; firmë na esperansë shtë na'a de quë adë rëazë guëtëdi'i të shnezë më. Rac bë'a na'a de quë ziquë rzac zi të purquë na të shmënë më, gunë më consolar lë'e të juntë con lë'e na'a.

⁸Bëchi, rac shtu'u na'a gac bë'a të blac cusë durë naziadëdë na'a regiuni shtë Asia. Nga'li bédëdë na'a tubi prëbë ru'bë. Hia casi bërë fusersë parë gua'a ldu'u na'a lu ra cusë ni. Gualdí ldu'u na'a niati na'a lueguë. ⁹Bëdë'në na'a llgabë na na'a ziquë tubi naná condenadë lu galguti, perë zni gac parë tsaldí ldu'u na'a shti'dzë Dios más, el quë nanapë pudërë të guëldishtéhi' tégulë ladi ra tégulë. Ra cusë durë gac rahin të parë adë gápëdi'i na'a confiansë mizme lë'e na'a. ¹⁰Dios bëlá më lë'e na'a lu peligrë nu tsagla'guë quëhunë më salvar lë'e na'a parë gátidi'i na'a. Rialdí ldu'u

na'a lè'è mè gúni' salvar lè'è na'a stubi vultè lu peligrè shtë galguti. ¹¹Lè'è tè napè què gunè tè compaṇi lè'è na'a. Si talè zihani mènè gunè rall compaṇi lè'è na'a con oraciuni, zihani mènè guèdè'è graci lu mè por ra favurè nangunè mè parè lè'è na'a.

Adè guádi'i Pablo Corinto

¹²Nanú tubi cusè narsèquitè ldu'u na'a. Shgabè na'a rni'i de què nadzú na'a tubi manèrè za'què nu santu entrè ra mènè shtë guédchiliu nu zac entrè lè'è tè. Na na'a verdá. Zni guquèrèldè na'a, lédèdi'i por llni shtë na'a sino por favurè shtë Dios. Bè'nè mè compaṇi lè'è na'a. ¹³Quèquè'è na'a lu tè sulè ra cusè narac gu'ldè tè nu rac riasé tè. Quèbezè na'a de què guèdè'è tè cuendè shti'dzè na'a; ¹⁴Hia riasé tè tubi partè shtë ra cusè ni. Quèbeza de què iurè lè'è Dadè Jesús guèabri' stubi, lè'è tè guèquitè ldu'u tè de lè'è na'a cumè lè'è na'a guèquitè ldu'u na'a de lè'è tè.

¹⁵Por tantè confiansè nanapa de lè'è tè, runa llgabè gueldè guènahia lè'è tè lueguè, antsè tsahia stubi lugar; nu iurè guèabrá guènahia lu tè stubi, guèquitè ldu'u tè. ¹⁶Runa llgabè de què guna visitar lè'è tè mizmè tiempè guziahia parè Macedonia; nu despuèsè guèabrá de ndè, gueldè guènahia lè'è tè stubi tè parè gunè tè compaṇi na; guèshe'ldè tè na parè Judea. ¹⁷¿Pè rni'i tè de què nahia falsè iurè guni'i ldua'a zni? ¿Gu nahia ziquè mènè shtë guédchiliu? ¿Llua'a tè de què cagnia'a lu tè: "Aha!" nu mizmè tiempè rnia'a: "Aquèdi'i"? ¹⁸Dios

na mè testigu de què lè'è na'a adè chu rní'idi'i: "Aha!" nu "Aquèdi'i" al mizmè tiempè ¹⁹purquè Jesucristo shini Dios, nunquè guni'i mè: "Aha!" u "Aquèdi'i" al mizmè tiempè. Lè'è Silvano nu Timoteo con na Pablo, biadi'dzè na'a lu tè diza'què shtë mè. Con Cristo lè'è diza'què siempè napè resultadè. Nahin verdá.

²⁰Pues por lè'è Jesucristo grè ra promèsè shtë Dios gac cumplir. Por ni iurè quèhunè na'a alabar Dios, rni'i na'a: "Nia Dadè" purquè unidè na na'a con Cristo Jesús. ²¹Dios na el què nabè'nè parè dzulezè na'a lu shnezè Cristo juntè con lè'è tè, nu Dios na el què nabèshe'ldè lè'è na'a con shti'dzè mè. ²²Lè'è mè gulé mè lè'è hia'a nu bène'e mè Espíritu Santo parè cuezènuhi' lè'è hia'a; náhi' tubi garantiá de lo què nague'dè'na'a recibir despuèsè.

²³Cagna'ba Dios tè gac mè testigu en cuntrè de na si talè ruadi'dza bishi. Adè bènèdia'a visitar lè'è tè, mè Corinto, purquè adè guc shtú'udia'a guna cashtigu lè'è tè.

²⁴Adè rnibé'adi'i na'a pè cusè tsaldí ldu'u tè; hia bien dzu tè firmè lu shnezè mè; nadè más guèdè'nè na'a compaṇi lè'è tè, tè guèquitè ldu'u tè.

2 Por partè shtëna adè gúnèdia'a visitar lè'è tè iurne' tè parè adè gaquin cusè durè parè lè'è tè. ²Si talè resultadè shtë visitè na galèriá ldu'u parè lè'è tè, ¿chull gunè parè guèquitè ldua'a? Sulè lè'è tè guèsèquitè ldu'u tè na. ³Por ni bèquè'a lu tè tubi cartè más antsè; bènehia conseju parè lè'è tè, tè parè gac règlè asuntè ni. Iurní iurè guèdchinia ndè, adè riádi'i

ldua'a por conductë shtë të. Mejurë napa segurë de quë si talë guëquitë ldua'a iurní, también guëquitë ldu'u të. ⁴Iurë bëquëa'a cartë más antsë, nalé rquëdi'ni ldua'a; bëru'u nisë slua; perë adë bëquë'edia'a lu të parë guëa'në të tristë sino bëquëa'a lu të parë gac bë'a të nalé rac shtua'a lë'ë të.

**Nanú perdunë parë lë'ë
nguiu nabë'në mal**

⁵Si talë tubi mënë bé'nëll parë riá ldua'a, también bé'nëll parë riá ldu'u grë të. Perë adë rac shtú'udia'a guënia'a demasiadë cusë cuntrë nguiu ni; ⁶cashtigu naná bédë'ë të parë lé'i'; casi grë të guc të de acuerdë; hía na sufsientë parë lé'ëll. ⁷Iurne' runë tucarë gunë të perdunë nguiu ni, nu gulë bë'në consolar lé'ëll, no sea por tantë llgabë narúnëll, guëazë guëtëll shnezë Dios. ⁸Por ni quëhuna ruëguë lu të stubi, de quë guëlua'a të lu nguiu ni de quë rac shtu'u të lé'ëll. ⁹Bëquëa'a lu të más antsë të gac bé'ahia si talë na të obedientë, si talë rzu'bë diaguë të shti'dza. ¹⁰El quë naquëhunë të perdunë, también runa perdunë lé'ëll. Si talë nanú stubi cusë narunë tucarë guna perdunë, pues bëna perdunë lé'ëll parë bien shtë të. Nané Cristo rnia'a verdá. ¹¹Cha guëdë'na'a zní të parë adë gúnëdi'i Satanás gan lu hía'a. Pues rdë'ë hía'a cuendë manërë narunë Satanás parë guësiguëll mënë.

**Adë rbedchídi'i ldu'u
Pablo guë'dchi Troas**

¹²Iurë bédchinia guë'dchi Troas parë guadi'dza diza'quë shtë

Cristo, bédzela zihani lugar parë guadi'dza shti'dzë më ¹³perë adë bédchini cuntëntë purquë adë bédzélédia'a bëcha Tito ndë; por ni bëna despedir lë'ë mënë shtë Troas nu guahia hashtë regiuni shtë Macedonia.

Cristo quëhúni' parë guëdë'na'a gan

¹⁴Dushquilli Dios el quë nazianú lë'ë hía'a lu desfile shtë Cristo Jesús. Lë'ë më quëhúni' parë guëdë'na'a gan lu enemigu guëdubi tiempë, nu quëhunë më compa'ni lë'ë hía'a parë guadi'dza'a diza'quë naná ziquë olor nashi naná rrë'tsë por grëtë' partë. ¹⁵Na hía'a ziquë olor nashi naná quëhunë Cristo ofrecërë lu Dios Padre. Parë bédlá mënë vidë shtë hía'a quëhunë parë rëagná ldu'u rall na rall salvar, perë parë sëbëldá mënë na hía'a parë rëagná ldu'u rall na rall condenar. ¹⁶Parë ra narniti, na hía'a ziquë olor narguini mënë, perë parë ra naná salvar, na hía'a ziquë olor nashi shtë guë'ë purquë shti'dzë më naruadi'dza'a rne'e vidë sin fin. ¿Chull napë llni sufsientë parë gúnëll cumplir grë cusë rë'? ¹⁷Pues lë'ë na'a adë nádi'i na'a ziquë zihani mënë naquëhunë neguci con shti'dzë Dios. Adë rdë'nëdi'i na'a cambi shti'dzë më ziquë runë zihani mënë; al contrari na na'a verdá. Lë'ë Dios bëshé'ldi' lë'ë na'a nu delantë lu më ruadi'dzë na'a shti'dzë më purquë quëbezënú Cristo lë'ë na'a.

Lë'ë tështë cubi

3 Iurë rni'i na'a ra cusë rë' ¿gu rzublú ruadi'dzë na'a favurë de mizme lë'ë na'a? u ¿llua'a të

rqui'ni guëdë'në na'a presentar tubi cartë shtë recomendación parë lë'ë të? u ñllua'a të napë quë guëdë'në na'a recibir cartë shtë recomendación nabëquë'ë të? Aquëdi'i. Stubi mënë rqui'ni cartë ni. ²Lë'ë të na të ziquë cartë shtë recomendación. Mënë guená rall vidë shtë të nu tsasé rall na na'a muzë shtë Dios. ³Lë'ë të na të tubi sēni de quë dchi'ni nabëdë'në na'a ndë, ze'din de Dios. Mënë rni'i rall na të cartë shtë Cristo por dchi'ni nabëdë'në na'a entrë lë'ë të. Na të tubi cartë nanádi'i escritë con tindë sino por el Espíritu Santo shtë Dios nanabani. Na të tubi cartë nagúquëdi'i escritë lu tablë shtë guë'ë ziquë ra chi'i mandamientë, sino tubi cartë escritë lu ldu'u të.

⁴Por Cristo napë na'a segurë de quë na na'a muzë shtëhi' nu delantë lu Dios adë nídi'i cusë parë guëtú lu na'a lu më. ⁵Lë'ë na'a adë cagní'idi'i na'a de quë mizme lë'ë na'a napë na'a llni parë guëdë'në na'a shchi'ni më, sino cagne'e më llni nu fuersë parë lë'ë na'a. ⁶Pues lë'ë më bëne'e më guia'a na'a pudërë nu llni parë guëdë'në na'a sirvë lë'ë më parë guëni'inú na'a lu ra mënë tubi tēstë cubi entrë Dios nu mënë. Lë'ë tēstë ni adë naescritëdi'in sino ze'dë de Espíritu Santo. Lë'ë lëy escritë rsëdchinin galguti parë grë mënë perë lë'ë Espíritu Santo rsëdchíni' vidë sin fin.

⁷Lë'ë lëy nabëquë'ë Moisés guc escritë lu tablë shtë guë'ë nu bēdchinin con galërabtsë'ë shtë Dios; nalé fuertë bēdchinin hashtë ra më israelitë adë gúquëdi'i nianá rall lu Moisés purquë nalé

rabtsë'ë lúhi' por du'pë tiempë. Si talë bēdchini lëy con zihani llni nu lë'ë lëy quēhunë condenar ra mënë lu galguti, ⁸lë'ë di'dzë nabēsēdchini Espíritu Santo, napë quë guēdchinin con más pudërë quë lë'ë lëy. ⁹Quiere decir, si talë lëy nabë'në condenar lë'ë hia'a, bēdchinin con llëru'bë pudërë nu llni, mucho más lë'ë diza'quë shtë Dios napin pudërë. Llëru'bë nahin; rni'in manërë gáca'a ziquë mënë nabë'në cumplir grë puntë shtë lëy. ¹⁰Lë'ë lëy guc cusë nanapë llëru'bë valurë por du'pë tiempë perë iurne' lë'ë diza'quë más lasaquin quë lëy; napin más pudërë; nunquë adë rialúdi'in. ¹¹Si talë lo quë narua'a ldu'u por du'pë tiempë, napin llëru'bë valurë, mucho más valurë napë lo quë adë rialúdi'i parë siempër.

¹²Zni nalé firmë na esperansë shtë na'a; por ni ruadi'dzë na'a con tubi confiansë ru'bë. ¹³Adë rúnēdi'i na'a ziquë Moisés el quë narsë'au lúhi' con tubi lari të parë adë guénádi'i ra israelitë guēaldë llni naná ruá'adi'i ldu'u llëru'bë tiempë. ¹⁴Perë lë'ë rall adë guasédi'i rall; naguēdchi bëac ldu'u rall. Todavía hashtë iurne' iurë rini rall Sagradas Escrituras, nacahi ldu'u rall. Nahin ziquë tubi lari narsë'au lu rall; adë rnádi'i rall; adë riasédi'i rall purquë sulë Cristo rac guēdchisú lari ni parë gac bë'a rall. ¹⁵Hashtë iurne' iurë rini rall ra di'dzë nabëquë'ë Moisés, na ziquë tubi lari narsë'au llgabë mieti; adë riasédi'i rall shti'dzë më. ¹⁶Perë iurë tubi mieti riabrí ldú'ull con lë'ë Dadë, iurní rdchini llni la'ni ldú'ull nu riasëll;

adë pë narsë'au shgábëll. ¹⁷Lë'ë partë shtë Sagradas Escrituras nacagni'i shcuendë Dadë, cagni'in náhi' mizmé lë'ë Espíritu Santo; nu catë nanú Espíritu Santo, nga'li ra mënë nádi'i rall bajo ordë shtë lëy guahietë. ¹⁸Por ni grëtë' hia'a hiadë nadápëdi'i hia'a ziquë lu nanë'au con tubi lari, sino na hia'a ziquë tubi guë'guanë narabtsë'ë pudërë shtë Dadë. Hia iurní lë'ë hia'a tsagla'guë rac cambi hia'a; rëaca'a más y más ziquë Cristo purquë quëdë'na'a recibir pudërë nu llni shtë më. Zni canihunë Dadë naná lë'ë Espíritu Santo.

4 Por grë ndë'ë nagunia'a lu të, nadapë na'a zihani confiansë. Bëga'a ldu'u më lë'ë na'a; por ni bënë'në na'a recibir di'dzë shtë tëtë cubi parë guadi'dzë na'a delantë ra mënë. ²Bëquë guia'a na'a grëtë' ra cusë naquëhunë mënë naga'chi, cusë narsëdchini shtu. Adë chu rsiguëdi'i sáhi', nilë adë chu rúnëdi'i cambi diza'quë shtë Dios. Rni'i na'a verdá lu mieti; zni rdë'në na'a recomendar mizmé lë'ë na'a lu grëtë' mënë nu delantë lu Dios. ³Si talë adë riasédi'i mënë lo quë narunë cuntienë diza'quë naquëgnia'a, si talë shti'dzë na'a nahin ziquë cusë naga'chi, es quë bëniti rall. ⁴Pues lë'ë rall adë rialdídí'i ldu'u rall shti'dzë më purquë lë'ë narnibë'a gué'dchiliu rë' bësé'aull shgabë rall parë tsasédi'i rall, no sea guëdchini llni shtë Dios guëc rall nu tsasé rall diza'quë nanapë pudërë shtë Cristo. Cristo na igual ziquë Dios. ⁵Iurë ruadi'dzë'nú na'a ra mënë, adë ruadi'dzëdi'i na'a shti'dzë na'a sino

ruadi'dzë na'a shti'dzë Jesucristo, el quë narnibë'a lë'ë hia'a. Nu lë'ë na'a nadë más na na'a muzë shtë të parë gac unidë të con Jesús. ⁶El mizmé Dios naná bëshe'ldë llni catë nanú nacahi, también bëshe'ldë më llni la'ni ldu'u hia'a të guadí'dza'a diza'quë lu mënë. Nadápa'a llni nu riasé hia'a blac llëru'bë na llni nu pudërë shtë më purquë Jesucristo quëgluá'ai pudërë shtë Dios.

Pudërë nadápa'a ze'dë de Dios

⁷Lë'ë diza'quë nabëdë'në na'a recibir, ze'dë de Dios perë ra shcuerpë na'a na débíl ziquë gue'su guiu'u të parë guëlua'a de quë grëtë' pudërë shtë'në na'a, ze'dë de Dios; adë zé'dëdi'in de mizmé lë'ë na'a. ⁸Zni nahin aunquë rzac zi mënë lë'ë na'a demasiadë, nunquë adë nadzúdi'i na'a sin quë adë chu guëdzélëdi'i ca nezë guëru'u na'a. Aunquë riá ldu'u na'a, siempre rbedchí ldu'u na'a. ⁹Aunquë rzunalde mënë lë'ë na'a, adë chu nádi'i ziquë tubi me'dë bëzebi. Aunquë rlua'a de quë bënë'në Satanás gan lu na'a, nídi'in fin shtë na'a. ¹⁰Cualquier lugar naziá na'a, ra mënë rna rall de quë quëdë'në na'a sufrir ziquë Jesús bënë'në më sufrir iurë guti më. Quëdë'në na'a sufrir të parë guëlua'a de quë nabani më la'ni ldu'u na'a. ¹¹Aunquë nabani na'a, na na'a dispuestë gati na'a purquë na na'a shmënë Jesús të parë guëlua'a pudërë shtë Jesús por medio de shcuerpë na'a nanapë quë tsalú. ¹²Zni galguti dzu guëlladchi parë lë'ë na'a con resultadë de quë nabani të. ¹³Nadapë na'a mizmé fe nanapë el quë bëquë'ë zndë'ë la'ni Sagradas

Escrituras: “Gualdí ldua'a, por ni biadi'dza”. Zni zac lë'ë na'a rialdí ldu'u na'a shti'dzë më; por ni ruadi'dzë na'a. ¹⁴Rac bë'a na'a de quë Dios nabëldishtë Dadë Jesús ladi ra tégulë, también zac lë'ë hia'a guëldishtë më juntë con Jesús nu guala'a më lë'ë hia'a tē parë cuezënú hia'a lë'ë më. ¹⁵Rzac zi na'a grë ra cusë durë purquë rac shtu'u na'a lë'ë tē nu parë grë narunë recibir ra favurë shtë Dios, gac rail' cantidá mënë nu guëdë'ë rall graci lu më; guëni'i rall llëru'bë na pudërë shtë më.

¹⁶Por ni rquitë ldu'u na'a guëdubi tiempë aunquë nilë shcuerpë na'a rdubin. Cadë dzë quëac na'a nacubi; quëdë'në na'a recibir más fuersë shtë më. ¹⁷Grëtë' galërzac zi iurne', na ziquë tubi cusë nashashu nu rialuhin lueguë, perë quëhunë ra cusë ni parë guëdápa'a delantë ziquë tesurë namás llëru'bë nu namás lasac. ¹⁸Pues adë rúnëdi'ia'a confiar por ra cusë narná mieti sino por ra cusë nadë rnádi'i mieti, purquë grëtë' ra cusë narná hia'a, napë quë tsalú. Grë ra cusë nadë chu rnádi'i, ni adë tsalúdi'i parë siempër.

5 Rac bë'a hia'a si talë gátia'a, Dios bé'ni' preparar cuerpë cubi nadë rialúdi'i. Lë'ë cuerpë shtëna'a na ziquë tubi hiu'u narialú perë cuerpë naguëne'e Dios nápëdi'in fin. Lëdë nguúdi'i bë'në formarín. ²Mientras nabánia'a lu gué'dchiliu, pues rac ldu'u hia'a nu nalé rac shtu'u hia'a guzëá hia'a stubi lugar, lídcha'a lu gube'e ³tē parë nga'li gunë më parë adë chu runë fáltëdi'i niétiquë. ⁴Mientras

nabánia'a con cuerpë shtë gué'dchiliu rë', rdé'na'a sufrir; rialdí ldu'u hia'a shti'dzë më, perë lëdë por nídi'i rac shtu'u hia'a gátia'a, sino rac shtu'u hia'a gápa'a cuerpë cubi tē parë cuerpë nadápa'a iurne', gac cambin por cuerpë nanadë rialúdi'i. ⁵El quë nabë'në preparar ra cusë ni parë lë'ë hia'a na Dios nu bëne'e më Espíritu Santo cumë ziquë garantiá de lo quë naguëne'e më despuësë parë lë'ë hia'a.

⁶Por grë ndë'ë siempër nadápa'a llëru'bë confiansë. Rdë'ë hia'a cuendë de quë mientras nabánia'a lu gué'dchiliu, dzu hia'a zitu parë lugar catë guzëá hia'a, u sea runë faltë parë guëquërëlda'a con Dadë Jesús. ⁷Ziagla'guë nabánia'a, lédëdi'i por lo quë narná hia'a lúhi' sino purquë rialdí ldu'u hia'a shti'dzë më. ⁸Nadápa'a esperansë nu rac shtu'u hia'a guësëá'na'a gué'dchiliu rë' tē parë guëbánia'a con lë'ë Dadë. ⁹Por ni rni'i ldu'u hia'a guësëquitë ldu'u hia'a lë'ë më mientras quërëlda'a lu gué'dchiliu nu también si talë gátia'a, rac shtu'u hia'a guëa'në më cuntëntë con lë'ë hia'a. ¹⁰Zni rdé'na'a purquë Dios guësëdchini më grë hia'a delantë Cristo catë gunë më juzguë lë'ë hia'a. Cadë túbia'a guëdë'na'a recibir pagu según lo quë bédë'na'a mientras nabánia'a, sea cusë za'quë u sea cusë mal; guëdë'na'a recibir pagu narunë tucarë.

**Diza'quë narsëdchini
galërbezë ldu'u mieti**

¹¹Por ni rac shtu'u na'a guësëdchini na'a mënë lu Jesús purquë rdë'në na'a cuendë nadushë

na juici shtë më. Lu Dios quèrèldë na'a bien; rdë'ë më cuendë lla na na'a nu rac shtua'a guèdë'ë të cuendë quèrèldë na'a sin maldá. ¹²Adë quèdë'nèdi'i na'a recomendar mizmə lë'ë na'a lu të stubi, sino quèdë'në na'a parë guèquitë ldu'u të por shchi'ni na'a. Zni rac guèquebi të lu ra mënë narunë nadchini por custumbrë narunë rall cumplir, perë adë rúnèdi'i rall casë ra cusë falsë nananú la'ni ldu'u rall. ¹³Si talë na na'a luguë ziquë rni'i bèldá mënë, nahin parë guèdë'në na'a alabar Dios. Si talë chu nádi'i ziquë luguë, nahin parë bien shtë të. ¹⁴Lo quë nardë'në na'a, nahin purquë nalé rac shtu'u më lë'ë hia'a. Nadapë na'a segurë de quë tubi guti por grètë' hia'a, por ni hia grètë' mieti na ziquë ra naguti. ¹⁵Cristo guti por grètë' mënë parë guèbani mieti nu parë gunë mieti cumplir voluntá shtë më, lédèdi'i parë gunë rall cumplir lo quë narac shtu'u rall. Runë tucarë gunë mieti cumplir voluntá shtë el quë naguti shlugar rall, el quë naguashté ladi ra tégulë parë gac salvar rall. ¹⁶Por ni adë chu guèní'idi'i lasac ra mënë por lo quë na rall la'ni gué'dchiliu, aunque antsë zni rdë'në na'a llgabë. Guni'i na'a Cristo nadë más náhi' nguiu, perë iurne' hiadë chu rúnèdi'i llgabë zni. ¹⁷El quë naná unidë con Cristo, nall personë cubi; ra cusë gushë hia gualú parë nguiu ni. Hia bédchini vidë cubi parë lë'i'.

¹⁸Grètë' ndë'ë ze'dë de Dios. Bë'në më parë tsu en paz entrë lë'ë më nu lë'ë hia'a. Iurne' na hia'a amigu shtë Dios por galguti shtë Jesús, nu bè'në më incarguë lë'ë hia'a parë

guadi'dzénú hia'a ra mënë diza'quë të parë gac unidë rall con lë'ë më.

¹⁹Quiere decir de quë iurë guti Cristo lu cruz, Dios quèhúni' recibir grë mieti narëta' lu gué'dchiliu ziquë amigu shtë më. Bédchisú më grë demandë naná en cuntrë lë'ë rall. Nu bè'në më incarguë lë'ë hia'a con diza'quë të gac mënë amigu shtë Dios. ²⁰Zni zèdë'pë na'a; na na'a representantë shtë Cristo, cumë ziquë mizmə Dios nihunë më ruëguë lu të, cagni'inú na'a lë'ë të, gulë bè'në recibir perdunë shtë më të gac të amigu shtë'i'. ²¹Jesús nunquë bé'nèdi'i' duldë, perë Dios bè'në tratë shíni' ziquë pecadurë, ziquë tubi nabë'në grë duldë, parë gac tubi manërë su hia'a delantë lu Dios sin ni tubi demandë en cuntrë lë'ë hia'a. Iurní quèhunë Dios tratë lë'ë hia'a ziquë mënë nabë'në cumplir grë puntë shtë lëy dizdë bédchini hia'a lu gué'dchiliu.

6 Verdá na ndë'ë; con Dios quèdë'në na'a dchi'ni nu rdë'në na'a ruëguë lu të, gulë bè'në recibir ra favurë shtë më të gapë të provéchë la'ni vidë shtë të ²purquë rni'i më la'ni Sagradas Escrituras:

Bëna compa'ni lë'ë të iurë guna'bë të lua.

Iurne' bëga'a iurë parë gunë të recibir favurë shtë më.

Nedzé na parë gac salvar të.

³Lë'ë na'a adë rzúdi'i na'a storbë lu mënë parë adë chu guèni'i mal cuntrë dchi'ni shtë'në na'a, ⁴sino rac shtu'u na'a guèlua'a na'a na na'a muzë shtë Dios guèdubi tiempë. Gac bè'a rall na na'a siervë shtë më por pacënci ru'bë nadapë na'a nu iurë rzac zi mënë lë'ë na'a nu

iurè runè faltè lo què narqui'ni na'a, u iurè rdèdè desgraci. Guèdubi tiempè quèrèldè na'a ziquè muzè shtènè mè. ⁵Ra mènè bèdè'è rall gálnè; gua na'a prèsi; bèdzatsu mènè cuntrè lè'è na'a; bèdè'nè na'a sufrir lu dchi'ni durè; avèsè adè chu rgá'sidi'i; avèsè nídi'i nagáu na'a. ⁶Nu zac rlua'a na'a na na'a muzè shtè Dios por conductè za'què shtènè na'a; nu zac purquè riasè na'a verdá, nu zac na na'a pacènci, nu purquè na na'a nadu'u, nu por lè'è Espíritu Santo nacuezènú lè'è na'a, nu purquè rac shtu'u na'a sa' na'a de verdá. ⁷Nu zac rac bè'a mieti na na'a muzè shtè Dios purquè ruadi'dzè na'a verdá; nadapè na'a pudèrè shtè Dios. Vidè shtènè na'a na tubldí delantè lu mè; pues nahin ziquè gui'bè parè tildinú na'a enemigu shtè na'a. Con gui'bè ni quèdè'nè na'a defender lè'è na'a nu runè na'a gan lu enemigu shtè na'a. ⁸Nanú mènè narunè honrar lè'è na'a; sèbèldá mènè rtu lu rall de lè'è na'a. Bèldá mènè rni'i rall bien de lè'è na'a; sèbèldá mènè rni'i rall mal de lè'è na'a. Bèldá vueltè bè'nè ra mènè tratè lè'è na'a ziquè mènè falsè. Bèldá vueltè bè'nè mènè tratè lè'è na'a ziquè ra narni'i verdá. ⁹Avèsè runè rall tratè lè'è na'a ziquè naná guènédi'i rall, perè avèsè runè rall tratè lè'è na'a ziquè mènè nanané rall bien. Avèsè mèrè gati na'a perè zia gla'guè nabani na'a. Rac cashtigu na'a perè adè chu rátidi'i. ¹⁰Aunque riá ldu'u na'a perè mizmè tiempè rquitè ldu'u na'a. Na na'a prubi perè quèdè'nè na'a shchi'ni Dios tè parè gac mènè ricu. Aunque nadápèdi'i na'a cusè

shtè gué'dchiliu, perè grètè' ra cusè nashtènè na'a.

¹¹Lè'è tè mè Corinto, quègni'i na'a lu tè con guèdubinú ldu'u na'a; adè bèca'chi ldú'udi'i na'a ni tubi di'dzè tantè rac shtu'u na'a lè'è tè. ¹²Por partè shtè na'a adè pè rúnèdi'i faltè parè gac shtu'u na'a lè'è tè perè lè'è tè, sí, runè faltè parè rac shtu'u tè lè'è na'a ziquè runè tucarè. ¹³Lè'è na'a rdè'nè na'a ruèguè lu tè ziquè tubi dadè narunè ruèguè lu shíni', de què gunè tè tratè lè'è na'a bien, mizmè manèrè ziquè quèdè'nè na'a con lè'è tè.

Na hia'a ziquè iádu'u catè quèbezè Dios

¹⁴Adè chu gúnèdi'i unir con ra nadè rialdídi'i ldu'i shti'dzè Dios. Si talè gunè tè zni, iurní na ziquè tubi ngunè nanádi'i igual con béchi'. ¿Lla gac unidè mènè dzabè con mènè za'què? ¿Llallè gac parè el què nanapè llni shtè Dios con el què naquèrèldè lu duldè? ¹⁵Nídi'i mudè gac Cristo de acuerdè con lè'è Satanás, u ¿lla gac tubi narialdi ldu'i shti'dzè Dios, gápèll partè con el què nadè rialdídi'i ldu'i shti'dzè mè? ¹⁶¿Ni mudè catè quèbezè Dios nanabani, tambièn runè sirvè parè ra dzanè ídolo? Pues lè'è hia'a na hia'a catè quèbezè Dios nanabani. Mizmè Dios guni'i:

Guèquèrèlda nu cuezénúa lè'è rall.

Gaca Dios shtènè rall.

Lè'è rall gac rall shmèna.

¹⁷Tambièn rni'i Dadè:

Adè tsaglá'guèdi'i tè ladi rall;
adè rgubénébidi'i tè ziquè runè rall.

Adë gápëdi'i të partë con el quë
narná tushë Dios;
iurní guna recibir lë'ë të ziquë
shinia.

¹⁸ Gaca Dadë shtë të; nu lë'ë të na
të ziquë llga'na nu shtsa'pa.
Zni rni'i Dadë narnibë'a grëtë
cusë.

7 Lë'ë të narac shtua'a, ni na
promësë shtë Dios nadápa'a;
por ni napë quë guëzuné hia'a de
grë cusë mal, tantë nananú la'ni
ldu'u hia'a nu lo quë nanú shgába'a.
Por rëspëti nadápa'a parë lë'ë më,
cha guëdë'na'a intriegu mizme
lë'ë hia'a lu më të guëquërélda'a
naza'quë delantë lu më, tubi vidë
limpi.

Ra më Corinto bënë rall cambi shgabë rall

² Gulë bédë'lë lugar la'ni ldu'u të
parë lë'ë na'a; adë chu bëluá'adi'i
cusë mal parë lë'ë të nu adë chu
rguguédi'i lë'ë të. ³ Adë rnia'a
ndë'lë parë guëdchi'ba galquíá
guëc të purquë ziquë gunia'a lu të
antsë, nalé rac shtu'u na'a lë'ë të.
Juntë guëbánia'a nu juntë gátia'a.
⁴ Llëru'bë confiansë napa parë lë'ë
të nu rnia'a lu mënë de quë nalé
rquitë ldua'a con lë'ë të. Aunquë
rzac zi na'a lu cusë durë, perë nalé
rquitë ldú'uhia nu nalé lëgrë ldua'a,
bënë të.

⁵ Dizdë bédchini na'a Macedonia,
adë guz'í'idi'i ldu'u na'a. Guëdubi
ladë runë mënë cuntrë lë'ë na'a.
Nanú ra narzunaldë lë'ë na'a nu
rdzëbë na'a. ⁶ Perë Dios bësëquitë
ldu'u na'a iurë lë'ë Tito bédchini.
Pues Dios na el quë narsëquitë ldu'u
ra nariá ldu'i. ⁷ Nu zac bësëquitë

ldu'u më ldu'u na'a purquë Tito
guní'i de quë rac shtu'u të guëná
të lua, de quë bini ldu'u të iurë
bënë të recibir primëre cartë
naná bëshe'lda. Guni'i Tito de quë
quëhunë të cumplir lo quë narac
shtua'a. Por ni bëquitë ldua'a más
todavía.

⁸ Aunquë primëre cartë
nabëquëa'a, bënë'nin të riá ldu'u të,
perë adë nádia'a tristë bëshé'ldahin
lu të. Por tubi tiempë sí, biá ldua'a
purquë bësédchini cartë ni tristë
la'ni ldu'u të por du'pë tiempë
⁹ perë iurne' rquitë ldua'a, lédëdi'i
purquë guc të tristë sino purquë
lë'ë galétristë ni, bënë parë bëabrí
ldu'u të con Dios. Lë'ë të guc të
tristë manëre narquitë ldu'u Dios.
Adë bédë'nëdi'i na'a ni tubi dañi
parë lë'ë të. ¹⁰ Lë'ë galëriá ldu'u
naquëhunë parë guëabrí ldu'u
mënë con Dios, na cusë za'quë.
Fin shtëhin na salvaciuni parë
lë'ë të; por ni rquitë ldua'a de quë
bëshe'lda cartë ni lu të. En cambi
lë'ë galëriá ldu'u nanapë mënë
shtë guédchiliu, quëhunin parë
guëniti mënë vidë shtë rall. ¹¹ Biá
ldu'u të de verdá nu lueguë bënë
të rëglë asuntë ni tubi manëre
nabësëquitë ldu'u Dios. Bëlua'a të
de quë nápëdi'i të faltë por asuntë
naguzac entrë lë'ë të. Bëldënu të
nguii nabënë mal. Nalé guc shtu'u
të guëa'në të bien delantë lu Dios.
Bënë të cumplir lueguë narunë
tucarë. Bënë të cashtigu nguii
ni. Clarë rlua'a de quë nápëdi'i të
culpë con nguii ni. ¹² Iurë bëquëa'a
primëre cartë, adë bëshé'ldahin lu
të sulamëntë purquë runa llgabë
por nguii nabënë mal, nilë por lë'ë

personë nabë'në nguü ni ofender, sino bëquëa'a cartë ni parë gac bë'a të tubi manërë clarë blac llëru'bë na rëspëti nanapë të parë lë'ë na'a. Bë'në të cumplir voluntá shtë Dios. ¹³Por ni rbedchí ldu'u na'a.

Además de ni bëquitë ldu'u na'a demasiadë purquë Tito nalé náhi' cuntëntë; rquitë ldú'i' purquë bësëdchini të lëgrë ldú'i'. ¹⁴Gunia'a lu Tito antsë de quë quërelde të bien nu rquitë ldua'a con lë'ë të; Pues iurne' adë rtúdi'i lua lu Tito. Ziquë grëtë' na verdá lo quë nagunia'a lu të, zni na verdá lo quë naguni'i na'a lu Tito. Rquitë ldu'u na'a con lë'ë të. ¹⁵Iurne' lë'i' másru'u rac shtú'ui' lë'ë të iurë rëagná ldú'i' lë'ë të manërë nabëzu'bë diaguë të lo quë nagunibé'aj', nu zac cumë bë'në të recibir lë'i' con rëspëti nu con hunurë. ¹⁶Rquitë ldua'a cumë napa llëru'bë confiansë gunë të cumplir lo quë narunë tucarë ziquë shmënë Dios.

Quëquë'ë Pablo lla guëdë'ë hia'a ofrendë

8 Bëchi, rac shtu'u na'a guadi'dzë na'a blac llëru'bë favurë bë'në Dios parë ra shmënë më naquërelde Macedonia. ²Napë rall zihani dificultá nu galërzac zi perë rquitë ldu'u rai'. Nápëdi'i rall zihani cusë shtë gué'dchiliu; prubi na rai' perë con guëdubinú ldu'u rai' bédë'ë rai' dumí parë guërë'tsë shti'dzë Dios más delantë. ³Nahia testigu de quë con guëdubinú ldu'u rai' bédë'ë rai' grë lo quë nanapë rai' hashtë más bédë'ë rai'. ⁴Bë'në rai' ruëguë lu na'a të guëdë'në

na'a permisi gunë rai' compa'ni ra shmënë Dios nanapë nicidá. Guquin tubi hunurë parë lë'ë rai'. ⁵Zni bë'në rai' hashtë más de lo quë nabëdë'në na'a llgabë. Primërë bédë'ë rai' mizmë lë'ë rai' të parë gunë rai' sirvë Dadë Jesús; despuësë bë'në rai' sirvë lë'ë na'a. Zni bë'në rai' purquë nahin voluntá shtë Dios. ⁶Ejemplë ni bësëquitë ldua'a, por ni bëna ruëguë lu Tito të tsagnall lë'ë të nu tsalú guëdë'a ofrendë. Pues Tito na el quë primërë guna'zi ldi obrë ni antsë entrë lë'ë të. ⁷Nalé quëhunë të sirvë lu Dadë; nalé rialdí ldu'u të shti'dzë më; nunquë rúnëdi'i të faltë parë ra cusë shtë më nu nalé rac shtu'u të lë'ë na'a. Iurne' quëhuna ruëguë lu të, gulë bë'në cumplir obrë za'quë narni'i ldu'u të parë ra shmënë Dios.

⁸Adë cagní'idia'a ndë'ë cumë ziquë ordë; sulë rac shtua'a gac bë'a të pë bë'në stubi mënë, de quë bë'në rall compa'ni ra prubi con guëdubinú ldu'u rall. Iurní guëlua'a si talë rac shtu'u të Dios. ⁹Hia nané të favurë nabë'në Jesucristo Shláma'a; nalé na më ricu perë guc më prubi; bësëa'në më lidchi më gube'le; bédchini më lu gué'dchiliu ziquë tubi prubi parë gapë të ra cusë nalasac de verdá.

¹⁰Bëna llgabë subrë shcuendë ni; iurní quëgnia'a lu të lo quë narunë tucarë gunë të, purquë dizdë tubi izë guc të primërë entrë los de más shmënë Dios; bédë'ë të ofrendë, lédëdi'i parë gunë të cumplir sulamëntë, sino con zihani ánimo guc shtu'u guëdë'ë të lë'ë dumí. ¹¹Iurne' tsagla'guë të hashtë tsalú con el mizmë deseo nanapë

të dizdë más antsë. Gulë bēdē'ē según lo quē nanapē tē ¹²purquē si talē tubi nguiu rac shtu'u guēdē'ēll tubi ofrendē, Dios rúni' recipir ra ofrendē ni según lo quē nanapē nguiu. Lē'ē mē adē rná'bēdi'i' guēdē'ē nguiu lo quē adē nápēdi'i' nguiu.

¹³Asuntē ni adē rúnēdi'i' tratē de quē obligadē na tē guēdē'ē tē ofrendē nu stubi mēnē adē bē gúnēdi'i' rall ¹⁴sino runē tratē de quē gunē mieti igual con sa' rall. Iurne' napē tē parē gunē tē compaṇi ra nabēnápēdi'i'. Stubi dzē lē'ē rall gunē rall ayudē lē'ē tē lo quē narunē faltē. Manērē ni nanú igual entrē grē mieti. ¹⁵Rni'i' Sagradas Escrituras: “El quē nabētēá zihani cusē, adē bēá'nēdi'i' subrē parē lē'i'. El quē nabētēá du'psē, adē bē'nē fáltēdi'i'.”

Tito nu ra sáhi'

¹⁶Dushquilli Dios el quē nabēdē'ē lu Tito mizmē deseo ziquē nanapa por lē'ē tē. ¹⁷Pues Tito guc de acuerdē con lo quē naguna'ba, nu zac lē'i' nalē rac shtú'ui' guēnáhi' lu tē. Iurne' tsagnáhi' lē'ē tē por prupi voluntá shtēhi'.

¹⁸Juntē con Tito quēgshe'ldē na'a tubi shmēnē Jesús. Entrē grē ra grupē shtē shmēnē Dios ruadi'dzē rall blac naza'quē na nguiu ni. Nu nalē rac ruadi'dzēll diza'quē. ¹⁹Lēdē niá'asēdi'i' bronquē ruadi'dzēll, sino ra grupē shtē shmēnē Dios, gulē nguiu ni parē gúnēll compaṇi lē'ē na'a lu viajē nu gúnēll compaṇi lē'ē na'a con ofrendē nanua'a na'a. Quēgdē'nē na'a dchi'ni ni parē gac honrar

Dadē Jesús nu parē guēlua'a na na'a dispuestē parē guēdē'nē na'a sirvē lu tē. ²⁰Rac shtu'u na'a adē chu guēdchi'bē galquiá guēc na'a por manērē quēdi'dzē na'a dumí ru'bē nanua'a na'a. ²¹Rni'i' ldu'u na'a gac na'a mēnē naza'quē, lēdē niá'asēdi'i' lu Dadē Dios sino tambiēn lu ra mēnē.

²²Nu quēgshe'ldē na'a stubi sa' hia'a con lē'ē rai'; náhi shmēnē mē nu zihani vultē bēluá'ai' lu ra cusē durē de quē náhi' tubi mē za'quē. Iurne' másru'u rac shtu'u guēnall lu tē tantē confiansē nápēll con lē'ē tē. ²³Si talē chu guēna'bē di'dzē shcuendē naná Tito, gulē guchi de quē lē'i' náhi' el quē naquēhunē compaṇi na parē guēdē'nē na'a sirvē lu tē. U si talē chu guēna'bē di'dzē shcuendē los de más bēchi la sa' na'a, gulē guchi de quē grupē shtē shmēnē Dios bēshe'ldē rai' lē'ē mēnē ni, nu gulē guchi de quē quēhunē rai' honrar Dadē Jesucristo. ²⁴Por ni gulē bēlua'a de quē rac shtu'u tē lē'ē rai' de verdá. Zni gac bē'a ra grupē shtē shmēnē Dios de quē napē tē amor shtē Jesús. Zni gapē na'a rsunē parē quēquitē ldu'u na'a con lē'ē tē.

Ofrendē parē ra shmēnē Jesús

9 Adē rquí'nidi'i' guēquēa'a lu tē shcuendē dumí nabētēá tē parē ra mēnē nabēzunē Dios almē shtē rai' ²purquē nanēa dizdē tubi izē na tē dispuestē guēdē'ē tē tubi ofrendē za'quē. Con galērquitē ldu'u cagnia'a lu ra mēnē shtē Macedonia; rnia'a de quē lē'ē tē, mēnē shtē Acaya, na tē preparadē parē gunē tē compaṇi ra prubi. Por

ejemplë shtë të casi grë rall rac shtu'u rall gunë rall igual. ³Perë quëgshe'lda ra naná bëchi sa' hia'a të parë adë guërú'udi'i cusë falsë nagunia'a lu ra mënë Macedonia. Rac shtua'a gac të preparadë ziquë gunia'a lu rall, ⁴no sea de quë cualquier de tubi më Macedonia sënáldëll na nu guëdzélëll lë'ë të adë nádi'i të preparadë con ofrendë ni. Hia iurní nahin tubi shtu parë lë'ë na'a purquë natchini guni'i na'a lu rall shcuendë të. Nu gaquin tubi shtu parë mizme lë'ë të purquë napë na'a zihani confiansë gunë të cumplir lo quë naguna'bë na'a. ⁵Por rsunë ni, llúa'ahia rqui'ni guëna'ba tubi favurë, quíblu ra bëchi sahia parë gunë rall compa'ni lë'ë të parë guëtëá të ofrendë nabë'në të prometer antsë. Zni lë'ë ofrendë shtë të nahin ziquë tubi muestrë de quë de verdá rac shtu'u të sa' të, lédëdi'i gac ofrendë ni ziquë cusë narne'e të por la fuersë sino bédë'ë të voluntariamente.

⁶Gulë bësëagná ldu'u të di'dzë rë': El quë narcabní du'pë bëndchi, du'psë cusechë rca'a nguui ni, nu el quë narcabní zihani bëndchi, zac guécá'all zihani cusechë. ⁷Cadë tubi de lë'ë hia'a napë quë guëdë'ë hia'a según narni'i ldu'u hia'a con guëdubínú ldu'u hia'a. Adë chu guëdë'ë ofrendë por la fuersë. Dios rac shtu'u el quë narquitë ldu'u iurë rdé'ëll ofrendë. ⁸Dios napë më pudërë parë guëne'e më hashtë gunë subrë grë lo quë narqui'ni të, të gapë të sufsientë parë mizme lë'ë të nu zac gapë të parë gunë të compa'ni sa' të con másru'u cusë za'quë. ⁹Sagradas Escrituras rni'i zndë'ë:

Bë'në më za'quë compa'ni ra prubi con lo quë nanapë rall. Ra obrë za'quë shtë mënë ni, adë tsalúdi'in.

¹⁰Dios rdë'ë bëní parë el quë narcabní nu rne'e më nagáu mieti. Segurë gunë ldai' më lo quë nanapë të parë gaquin más nu gunë më compa'ni lë'ë të, të parë gunë të zihani cusë za'quë. ¹¹Zni lë'ë të gapë të grëtë' clasë cusë nalasac parë rac guëdë'ë të tubi ofrendë za'quë. Hia iurní ra centavë nabë'në të intriegu guia'a na'a, gaquin motivë parë guëdë'ë zihani mënë graci lu Dios ¹²purquë por lo quë naquëgdë'ë të ca'a bëchi la sa' hia'a, lëdë niá'asëdi'i quëgdë'ë të lo quë narqui'ni parë guëbani rai', sino también zihani mënë gunë rall alabar Dios; guëdë'ë rai' graci lu më. ¹³Gunë rall alabar Dios purquë guëná rall cusë za'quë naquëhunë të; nahin ziquë sēñi de quë de verdá rzu'bë diaguë të diza'quë shtë Jesús. Nu zac gunë rall honrar Dios por ofrendë za'quë naquëgdë'ë të ca'a rall nu por lo quë naca'a los de más mënë. ¹⁴Lë'ë rai' guëna'bë rai' lu Dios por lë'ë të. Gapë rai' llëru'bë cariñi por lë'ë të purquë guëná rai' de quë Dios tsagla'guë quëhúni' zihani cusë za'quë parë lë'ë të. ¹⁵Dushquilli Dios por lo quë nabëzëlaa'dchi më, tubi regalë adë chu gúnëdi'i gan guëni'i blac llëru'bë nahin.

**Derechë nanapë Pablo
ziquë poshtë shtë më**

10 Na Pablo runa ruëguë lu të con mizme gálnadu'u nu pacënci nanapë Cristo. Gulë bë'në lo quë nacagnia'a. Rni'i mënë de

quë iurë quëreldeñúa lë'ë të, adë nápëdia'a valurë parë guadi'dza zihani cusë guëc të perë iurë zitu nanúa, iurní sí napa valurë. ²Runa ruëguë lu të de quë iurë gue'dë guënahia lë'ë të, adë nídi'i nicidá tildia lë'ë të. Pues lu bëldá mënë, sí, napë quë gapa valurë purquë quëgdch'i'bë rall galquiá guëc na'a. Rni'i rall quëgni'i na'a shti'dzë Jesús sulamëntë mizmë manërë ziquë ra mënë shtë gué'dchiliu. ³Verdá na de quë quëreldeñ na'a lu gué'dchiliu rë' perë adë quëgdíldidi'i na'a ziquë cualquier mënë shtë gué'dchiliu ⁴purquë ra armë nadápa'a, adë nádi'i rahin lo quë naruntsa'u mënë sino na rahin fuertë; napë rahin pudërë shtë Dios parë gunin gan lu grë ra fuersë mal. ⁵Zni quëgdë'në na'a gan lu grë llgabë nu galquiá nardch'i'bë mënë cuntrë Dios. Quëgdë'në na'a gan lu cualquier cusë nadchini nu cusë narcá parë adë gunguë bé'adi'i mënë Dios. Grë llgabë, grë galërni'i ldu'u shtë mieti naná cuntrë lë'ë më, quëgdë'në na'a ordenar parë guëzu'bë diaguë rahin shti'dzë Cristo. ⁶Nu na na'a dispuestë quëdë'në na'a cashtigu grë ra mënë naná rzu'bë diaguëdi'i shti'dzë më. Zni quëdë'në na'a iurë bë'në të cumplir grë cusë narunë tucarë gunë të.

⁷Lë'ë të quëhunë të juzguë sulë por lo quë narná të por fuërë. Si talë tubi de lë'ë të rni'il nadchini nal shmënë Cristo, napë quë gac bé'al de quë también lë'ë na'a na na'a shmënë më. ⁸Aunque nilë lë'ë na rnia'a nadchini de quë napa derechë parë guëni'bé'ahia lë'ë të,

adë rtúdi'i lua purquë lë'ë Dadë bëne'e pudërë rë' parë bien shtënë të parë su të más firmë lu shnezë më. Adë bëne'e më pudërë ni parë quëdë'në na'a dañi parë lë'ë të. ⁹Adë rúnëdi'i të llgabë të de quë rtsëba lë'ë të con ra cartë narshe'lda lu të. ¹⁰Ra mënë rni'i de quë di'dzë narquëa'a la'ni ra cartë, nadushë nu fuertë na rahin purquë zitu nanúa parë lë'ë të perë iurë quëreldeñúa lë'ë të, ruadi'dza sin pudërë; zni rni'i rall. Nu zac rni'i rall mudë naruadi'dza diza'quë, rrú'udi'i shnezin. ¹¹Perë el quë narni'i zndë'ë napë quë gac bé'all de quë lo quë narquë'lë na'a la'ni cartë dizdë zitu, quëdë'në na'a cumplir grë puntë ni iurë quëquëreldeñú na'a lë'ë të. Guëdë'në na'a lo quë narni'i na'a.

¹²Adë nápëdi'i na'a valurë parë guëni'i na'a na na'a igual con ra narni'i bien de mizmë lë'ë rall; adë chu rúnëdi'i comparar con ra naruadi'dzë bien de mizmë lë'ë rall. Lë'ë rall quëhunë rall tubi cusë tuntë nanadë rllu'ídi'i, purquë quëhunë rall comparar mizmë lë'ë rall con los de más mënë naná quëhunë igual. ¹³Adë rúnëdi'i na'a nadchini, sulamëntë runë tucarë guëni'i na'a de lo quë bédë'në na'a, lédëdi'i por lo quë nabë'në stubi mënë. Pues Dios quëglua'a më lo quë narunë tucarë quëdë'në na'a nu bëne'e më permisi parë be'dë guëni'i na'a diza'quë lu të naquëreldeñ Corinto. ¹⁴Adë quëgni'ídi'i na'a lo quë nadë rúnëdi'i tucarë iurë rni'i na'a napë na'a derechë parë quëdë'ë na'a cunseju, purquë lë'ë na'a na na'a

primèrè naná biadi'dzè diza'què entrè lè'è tè. Cagni'i na'a lu tè purquè nadapè na'a derechè. ¹⁵Adè runè narú'bèdi'i na'a por dchi'ni nabè'nè stubi mènè si fuèrè nahin shchi'ni na'a, sino al contrari, rialdí ldu'u na'a de què iurè tsaldí ldu'u tè shti'dzè mè más, iurní guèru'u nezè parè guèdè'nè na'a más dchi'ni entrè lè'è tè hashtë regiuni más zitu tèchi ladzè tè. ¹⁶Pues rac shtu'u na'a guèni'i na'a diza'què entrè ra mènè naquèrèldè más zitu què lè'è tè. Zni adè guèni'idi'i na'a nadchini por lo què nabè'nè stubi muzè shtë Dios. ¹⁷Si talè chu rac shtu'u guèni'ill nadchini, pues runè tucarè guèni'ill lo què nabè'nè Dadè Jesucristo. ¹⁸El què nalasac delantè lu Dios, na el què lè'è mè rni'i nall nguiu za'què, lédèdi'i lè'è nguiu narni'i de mizmè lélèll de què lasáquèll.

11 Rac shtua'a guène'e tè sí parè guadi'dza lu tè ziquè tubi natuntè. Gulè bèqué diaguè lo què narnia'a ²purquè nahia ziquè tubi nahi' lu sa'll. Ndè ze'dè de Dios; pues na bëna comprometer lè'è tè con Cristo. Iurne' rac shtua'a guna presentar lè'è tè lu mè cumè ziquè lliguèna'a purè naná ca'a tubsè nguiu. ³Perè ziquè bè'nè serpentè, bèsigué ma lè'è Eva con mañi; rdzèba, no sea de què guèdè'è tè sí parè guèsigué Satanás lè'è tè nu guèazè guetè tè shnezè Cristo, de què adè tsaldídi'i ldu'u tè lè'è mè con guèdubinú ldu'u tè. ⁴Lè'è tè bien quèhunè tè recibir tubi naruadi'dzè de stubi Jesús gurènè, perè nádi'in shti'dzè mè nabiadi'dzè rall lu tè. Bien quèhunè

tè recibir con guèdubinú ldu'u tè tubi enseñansè nanádi'i de acuerdè con lo què nabè'nè tè recibir antsè. Quèhunè tè recibir stubi clasè diza'què nanádi'i de acuerdè con diza'què narni'i lla gac salvára'a. Bini tèhin antsè. ⁵Pues llúa'ahia de què adè lasáquèdia'a menos què ra mèsè ru'bè naquèhunè tè honrar entrè lè'è tè. ⁶Aunque ráquèdi'i parè ruadi'dza bien, perè rac bé'ahia bien lo què quèhuna predicar. Clarè guná tè grè lo què nabèdè'nè na'a; bien nahin.

⁷¿Gu bëna mal cuntrè lè'è tè iurè biadi'dza diza'què shtë salvaciuni sin adè bé'nèdia'a cubrè ni tubi centavè? Guca ziquè tubi nalasáquèdi'i tè parè guc tè ziquè tubi naná lasac. ⁸Bëna recibir dumí shtë ra shmènè Dios nardèa stubi lugar tè parè guna sirvè lu tè. ⁹Nu iurè gulezénúa lè'è tè, gupa nicidá perè adè guná'bèdia'a ni tubi cusè de lè'è tè. Ra shmènè Jesús naze'dè de Macedonia, mènè ni bëne'e rall lo què narunè faltè parè na. Zni bëna tè parè adè gápèdi'i tè carguè parè nicidá shtëna. Tsagla'ga guna mizmè manèrè ni. ¹⁰Nahia segurè ruadi'dza verdá shtë Cristo; por ni, ni tubi guécadi'i famè shtë na. Grè mènè shtë Acaya guini rall de què quèhuna predicar sin adè chu gúnèdi'i cubrè centavè. ¹¹¿Pèzielú ruadi'dza zni? ¿Pè nahin purquè adè rac shtú'udia'a lè'è tè? Aquèdi'i. Dios nané mè rac shtua'a lè'è tè.

¹²Na tsagla'guè guna ziquè na manèrè shtëna tè parè adè rac guèni'idi'i mènè na rall muzè shtë mè igual ziquè na, de què quèhunè rall shchi'ni Dios ziquè lè'è na'a.

¹³Na rall mësë falsë; rgugué rall mënë nadë más; gululé rall mizmë lë'ë rall poshtë shtë më. ¹⁴Perë rac tsaldí ldu'u hia'a zní quëhunë rall purquë mizmë Satanás rlua'alull lu mënë ziquë tubi ianglë nanapë llni shtë Dios. ¹⁵Por ni zihani vüeltë ra naná bajo ordë shtë Satanás, también rlua'alú rall lu mënë ziquë mënë za'quë. Perë grë ra mënë ni gunë rall recibir juici narunë tucarë según obrë nabë'në rall.

Galërzac zi shtë Pablo

¹⁶Stubi vësë rnia'a lu të, ni tubi de lë'ë të adë rúnëdi'i të llgabë de quë nahia ziquë tubi luguë; perë si talë zní runë të llgabë, gulë bëne'e sí parë guadi'dza ziquë tubi narunë nadchini. ¹⁷Adë quëgní'idia'a ndë'ë ziquë tubi mandadë shtë Dadë Jesucristo, sino ziquë tubi naná luguë. Pues nahia luguë si talë rnia'a lu të nalasaca. ¹⁸Pues nanú zihani ra nalé runë nadchini rall parë cusë shtë guédchiliu rë'. Nu zac na gunë nadchinia. ¹⁹Lë'ë të nalé rquitë ldu'u të con ra tuntë, tantë nasini guëc të. ²⁰Bien rdë'ë të sí parë lë'ë rall naná quëhunë obligar lë'ë të parë gunë të sirvë lu rall, nu rdë'ë të sí parë ra nardchisú lo quë nanapë të, nu rdë'ë të sí parë narac shtu'u guëñibë'a lë'ë të, nu rua'a ldu'u të narunë desprëci lë'ë të nu ra nargubé lu të. ²¹Rtu lua guënia'a lu të ndë'ë; adë nápëdi'i na'a valurë parë guëdë'në na'a ra cusë ni. Gulë bë'në perdunë lë'ë na'a.

Perë grë lo quë nanapë parë gunë naru'bë mieti, también rac runë naru'ba. Quëgnia'a ziquë tubi

narac luguë. ²²Lë'ë rall rni'i rall na rall më hebreo; nu zac na nahia më hebreo. Rni'i rall na rall mënë israelitë; pues nu na nahia më israelitë. Na rall llëbñí Abraham; pues nu na nahia llëbñí Abraham. ²³Rni'i rall na rall siervë shtë Cristo, pues lë'ë na nahia más quë lë'ë rall; nahia siervë shtë Cristo. Quëgnia'a ndë'ë ziquë tubi narac luguë. Nalé bëna dchi'ni más quë lë'ë rall. Guanúhia galné más quë lë'ë rall. Guahia lachigui'bë más quë lë'ë rall. Nu zihani vësë mërë niatia. ²⁴Ga'i vësë ra më israelitë bëne'e rall cashtigu treinta y nueve galné chicuti. ²⁵Tsunë vësë bëne'e hiaguë rall na. Tubi vësë bëne'e guë'ë rall na. Tsunë vësë né'azë barcu naná ziazúa lu nisë. Tubi vësë nanúa lu nisëdu'u con tubi ldë tablë dzë la gue'lë parë bédchinia lu guiu'u. ²⁶Zihani vësë gudëda ra viajë. Zugá'ahia lu ra peligrë shtë nisë guë'ë'gu nu peligrë shtë nguba'në nu peligrë shtë ra mizmë sahia, nu zugá'ahia lu peligrë shtë ra më zitu. Nanúa peligrë entrë ra mënë shtë ciudá nu entrë ra mënë naquërelde fuërë shtë ciudá. Nanúa peligrë shtë nisëdu'u nu entrë ra bëchi la sahia naná falsë ra. ²⁷Napa zihani dchi'ni nu ra problemë; zihani vësë gudëde gue'la sin adë gutë ga'sidia'a; guzac zia lu galërlidia'në nu galërbidchi. Zihani vësë nápëdia'a nagauha. Guzac zia lu galnaldë nu runë faltë shaba.

²⁸Además de grë ra cusë rë', con ra más cusë, cadë dzë rac ldua'a por grë ra grupë shtë shmënë Dios. ²⁹Si talë nanú sahia naná débil; runë faltë parë tsaldí ldú'ull

shti'dzè mè, tambièn riá ldua'a. Si talè nanú shmènè Jesús naná débíl, nahin ziquè na nahia débíl. Si talè rsini mènè sa'll lu duldè, rldéa.

³⁰Si talè napè què gunè nadchinia, pues gunè nadchinia sulamèntè purquè nalé runè faltè parè gaca lo què narac shtu'u mè. ³¹Dios nu Shtadè Jesucristo Shláma'a, rac bè'a mè quègnia'a verdá. Runè tucaré guèdè'lè mieti labansè lu mè guèdubi tiempè. ³²Iurè guquèrela Damasco, lè'lè gubernadurè narunè sirvè rèy Aretas, bëshé'ldèll ra sultadè parè gupè rall puertè shtë ciudá parè guèna'zi rall na nu gua'a rall na prèsi, ³³perè por tubi ventanè shtë lu' bèldaguè ra mènè na la'ni tubi tètè. Zni bèna gan; bèrua'a guia'a gubernadurè ni.

Debilidá shtë nguui nu pudèrè shtë Dios

12 Ni tubi adè pè gúnèdi'i gan por guadí'dzèll bien de mizmé lètèll, perè napè què guènia'a shcuendè ra visión naná gunahia nu shti'dzè Dios nabèlu'a'a mè lua. ²Nanéa tubi nguui naná rialdí ldu'i shti'dzè Cristo; guc chidá izè bèldisè Dios nguui ni hashtë gube'e más guia'a. Adè rdé'èdia'a cuentè si lè'lè nguui guáhi' con cuerpè u sulamèntè espíritu shtëhi'. Dios rdé'lè cuendè de ni. ³⁻⁴Perè nanéa de què lè'lè nguui ni bèldisè Dios; adè rdé'èdia'a cuendè si guáhi' con cuerpè u sin cuerpè. Sulè Dios nanéhi'. Gua nguui ni hashtë lugar nalé paraíso nu bini' di'dzè naná más secretè. Ni tubi chu adè nápèdi'i permisi guadí'dzèll di'dzè ni. ⁵Bien rac

runa nadchini por nguui ni, perè adè gunè nadchínidia'a de ra cusè ni. Sulamèntè runè nadchinia por mudè nabèna sufrir por lè'lè Dadè. ⁶Aunque nilè rac shtua'a guadi'dza bien de mizmé na, pues adè nádi'in tubi cusè tuntè purquè quèadi'dza verdá. Adè guadí'dzèdia'a de mizmé na, no sea de què tubi sahia gúni' llgabè de què nahia más de lo què rna rall u lo què narini rall de na.

⁷Ra cusè nagunahia, nalé cusè ru'bè nahin; por ni bèdchini tubi cusè narini la'ni ldua'a ziquè tubi guitsè naná gua'sè lu cuerpè shtëna tè parè adè gunè nadchínidia'a. Nahin ziquè narunè dchi'ni Satanás parè quinin na tè adè gunè nadchínidia'a demasiadè. ⁸Tsunè vueltè guna'ba lu Dadè Dios tè parè guèdchisúhi' cusè mal de na ⁹perè lè'lè Dadè guni'i lua: “Amor shtëna quèbezènul. Pudèrè shtëna rlua'a mejurè iurè lè'lè mieti na ziquè tubi débíl nanápèdi'i fuersè.” Zni runè nadchinia iurè nápèdia'a fuersè tè parè guèlu'a'a pudèrè shtë Cristo la'ni vidè shtëna. ¹⁰Iurè nahia débíl, rquitè ldua'a; iurè rni'i mènè cuntrè na, iurè rzac zia lu cusè durè, iurè rzunaldè mènè na, iurè nanú dificultá purquè nahia shmènè Cristo, rquitè ldua'a. Iurè nápèdia'a fuersè, runè Dadè compa'ni na.

Rac ldu'u Pablo por ra shmènè Cristo

¹¹Nahia ziquè tubi luguè purquè quèadi'dza bien de mizmé na, perè lè'lè tè bè'nè tè obligar bènahin purquè lè'lè tè runè tucaré guadi'dzè tè bien de na; pues ni tubi adè lasáquèdi'i más què lè'lè na. Ra mèsè ziquè mèsè ru'bè naná

zianaldë të téchi', adë bé'nëdi'i rall dchi'ni ziquë na; nu lasáquëdia'a.

¹²Dchi'ni nabëna con llëru'bë pacënci entrë lë'ë të, quëglua'a de quë nahia tubi poshtë de verdá.

Nu zac ra milagrë, ra sëni, ra cusë ru'bë nabëna, quëglua'a de quë gudili më na ziquë tubi poshtë.

¹³Bëna tratë lë'ë të igual ziquë los de más shmënë Jesús naquërelde stubi lugar. Sulë tubi cusë, adë bëcádia'a ofrendë shtë të. Bë'në perdunë culpë shtëna purquë bëcádia'a dumí shtë të.

¹⁴Iurne' quëhuna preparar parë gueldë guënahia lë'ë të stubi. Nahin tecërë visitë shtëna, parë adë gueldë guëdchí'bëdia'a tubi carguë guëc të purquë adë rac shtu'udia'a dumí shtënë të sino rac shtua'a gáca'a unidë parë shchi'ni Jesús. Pues runë tucarë ra shtadë mieti guësëa'në herenci parë ra llguë'në, lédëdi'i ra llguë'në guëdë'lë rall herenci ca'a shtadë llguë'në. ¹⁵Na guëdubinú ldua'a guna gashtë lo quë nanapa hashtë guna gashtë grë fuersë nanapa parë bien shtë të parë tsaru'bë të espiritualmente. ¿Ni mudë por más rac shtua'a lë'ë të, menos rac shtu'u të na?

¹⁶Nanú bëldá mënë entrë lë'ë të; nané rall de quë adë bé'nëdia'a obligar lë'ë të niane'e të dumí cahia perë rni'i rall de quë con mañi bësiguëhia lë'ë të. ¹⁷¿Ni mudë bësiguëhia lë'ë të por ra nguiu nabëshe'lda nga'li? ¹⁸Guna'ba lu Tito të guidë guëna'll lë'ë të nu bëshe'lda stubi bëchi la sahia con Tito. ¿Ni mudë bësiguë Tito lë'ë të? ¿Pë lédëdi'i na verdá de quë lë'ë Tito nu na bëdë'në na'a tratë lë'ë të

mizmë manërë? Bëdë'në na'a igual parë bien shtë të.

¹⁹Tal vez runë shgabë të de quë quëdë'në na'a defender mizmë lë'ë na'a delantë lu të. Adë nádí'in zni sino al contrario, quëadi'dzë na'a delantë lu Dios nu por nombre shtë Cristo. Lë'ë të narac shtua'a, grë lo quë quëgdë'në na'a, na parë su të firmë lu shnezë Dios. ²⁰Rdzëba de quë iurë gueldë guënahia lë'ë të, tal vez nádí'i të ziquë ra naná rialdí ldu'i shti'dzë Dios de verdá, nu adë guëdzélëdi'i të na ziquë rac shtu'u të. Rdzëba de quë lë'ë të rdildi di'dzë të nu nanú dishi'bi entrë lë'ë të; rzebi ldu'u të pë shtë sa' të. Rldënu të sa' të; rni'i të cusë dzabë lu sa' të; nanú chismë ra, nu galëni'i guidzë sa', nu runë të naru'bë lu sa'. ²¹Rdzëba iurë guënahia lu të, Dios shtëna gunë më permitir gapa tristë la'ni ldua'a por conductë shtë të. Guëtú lua iurní hashtë runa por ra naná bë'në duldë antsë. Hashtë ne' adë bëagrídi'i ldu'u rall con Dios. Tal vez guënahia de quë todavía ziaгла'guë rquënu sa' rall, de quë napë rall zihani vici, de quë quëhunë rall cumplir deseo mal nananú la'ni ldu'u rall.

Rialú cartë rë' con tubi saludë

13 Ndë'ë na tecërë vësë naguna visitar lë'ë të. Cualquier galquiá nardchi'bë të guëc sa' të napë quë tsu prëbë con chupë u tsunë testigu. ²Bëtsëba ra mënë nabë'në duldë con los de más sa' rall. Stubi vësë más rtsëba lë'ë rall mientras zitu nanúa, igual ziquë bëna iurë be'dë guënahia lë'ë

të segundë visitë. Iurë guelda, guna cashtigu ra mënë narunë duldë sin rgá'adi'i ldua'a. ³Guëní'ihia fuertë lu rall purquë rac shtu'u të prëbë de quë quëbezënú Cristo na, de quë ruadi'dza por pudërë shtë më. Adë quëhúnëdi'i të tratë con tubi Cristo nanápëdi'i fuersë sino con tubi Cristo narlua'a pudërë shtëhi' entrë lë'ë të. ⁴Na verdá cuë më lu cruz cumë ziquë tubi nanápëdi'i fuersë, perë iurne' nabani më por pudërë shtë Dios. Zni zac lë'ë na'a, na na'a débíl, perë iurne' unidë na na'a con lë'ë më nu por lë'ë më nadapë na'a pudërë shtë Dios parë guëdë'në na'a sirvë lu të.

⁵Gulë bëtë'dë prëbë mizme lë'ë të, të parë gac bè'a të si talë rialdí ldu'u të shti'dzë më de verdá. ¿Pë adë rdé'ëdi'il cuendë de quë Jesucristo quëbezënúhi' lë'ë të si talë rialdí ldu'u të de verdá? ⁶Pues rac shtua'a de quë gac bè'a të, lë'ë na'a bëtë'në na'a cumplir shti'dzë më; na na'a verdá. ⁷Rna'ba lu Dios të parë adë gúnëdi'i të duldë. Zni rac shtu'u na'a, lédëdi'i parë guëlua'a de quë nadapë na'a pudërë. Rna'bë na'a lu më parë gunë të lo quë naná za'quë. Adë rúnëdi'i importë si talë rni'i mieti na na'a falsë u rni'i rall na na'a verdá. ⁸Adë nídi'i mudë guëdë'në na'a cuntrë verdá, sino sulamëntë rac quëdë'në

na'a favurë shtë verdá. ⁹Por ni rquitë ldu'u na'a iurë lë'ë na'a na na'a débíl perë lë'ë të su të firmë lu shnezë më. Tsagla'guë guëna'bë na'a lu Dios por lë'ë të parë gac të firmë lu shnezë më guëdubi tiempë. ¹⁰Quëquë'ë na'a cartë rë' antsë gue'dë guená na'a lë'ë të, të parë iurë lë'ë na'a zia na'a ndë, adë rquí'nidi'i guna cashtigu lë'ë të con derechë nanapa por Dadë Jesucristo. Pues lë'ë pudërë nanapa por Dadë Jesús, na parë bien shtë të parë másru'u tsaldí ldu'u të shti'dzë më, lédëdi'i nahin parë guëdë'a fin lu fe shtë të.

¹¹Iurne' bëchi, rac shtua'a guëru'u bien shchi'ni të. Gulë bëtë'ë sí parë gac cambi vidë shtë të hashtë na rahin completamente bien; gulë bëzu'bë diaguë shti'dza. Gulë gac të unidë; gulë guquërelëdënú të sa' të sin dishi'bi. Iurní Dios narne'e paz, nu Dios narunë parë gac shtu'u hia'a sa' hia'a, guëbezënú më lë'ë të. ¹²Gulë bè'në saludar grë ra shmënë Dios con tubi abrasë. ¹³Grëtë' ra shmënë Dios ndë'ë, rshe'ldë rall saludë parë lë'ë të.

¹⁴Gulë bè'në recibir bendición shtë Dadë Jesucristo nu amor shtë Dios con ayudë shtë Espíritu Santo. Gulë bè'në recibir favurë shtë më. Amén.